

武英殿聚珍版丛书

天

地

人

物

事

理

法

道

水經注卷三十八

後魏酈道元撰

資水

漣水

湘水

灕水

溱水

資水出零陵都梁縣路山

資水出武陵郡無陽縣界唐紕山蓋路山之別名也
謂之大谿水東北逕邵陵郡武岡縣南縣分都梁之
所置也縣左右二岡對峙重阻齊秀閒可二里舊傳
後漢伐五谿蠻蠻保此岡故曰武岡縣卽其稱焉大

谿逕建興縣南又逕都梁縣南

案近刻脫縣字

漢武帝元朔

五年以封長沙定王子敬侯遂之邑也

案遂近刻訛作定縣

西有小山山上有渟水既清且淺其中悉生蘭草綠

葉紫莖芳風藻川蘭馨遠馥俗謂蘭爲都梁山因以

號縣受名焉

東北過夫夷縣

夫水出縣西南零陵縣界少延山東北流逕扶縣南

案扶下近刻衍陽字

本零陵之夫夷縣也漢武帝元朔五年以

封長沙定王子敬侯義之邑也夫水又東注邵陵水

謂之邵陵浦水口也

案水字近刻訛在口字下

東北過邵陵縣之北

縣治郡下南臨大谿水逕其北謂之邵陵水魏咸熙

二年吳寶鼎元年孫皓分零陵北部立邵陵郡于邵

陵縣縣故昭陵也

案昭近刻訛作邵

谿水東得高平水口

案水

近刻訛作又

水出武陵郡沅陵縣首望山西南逕高平縣

南

案逕近刻訛作流

又東入邵陵縣界南入于邵水邵水又

東會雲泉水水出零陵永昌縣雲泉山西北流逕邵

陽南縣故昭陽也

案昭陽朱謀埠云疑作昭陵非也今攷郡國志昭陽屬零陵郡昭陵

屬長沙郡雲泉水又北注邵陵水謂之邵陽水口自下東

北出益陽縣其閒逕流山峽名之爲茱萸江蓋水變名也

又東北過益陽縣北

縣有關羽瀨所謂關侯灘也南對甘寧故壘昔關羽屯軍水北孫權令魯肅甘寧拒之于是水寧謂肅曰羽聞吾咳嗽之聲不敢渡也渡則成擒矣羽夜聞寧處分曰興霸聲也遂不渡茱萸江又東逕益陽縣北又謂之資水應劭曰縣在益水之陽今無益水亦或

資水之殊目矣然此縣之左右處處有深潭漁者咸輕舟委浪謠詠相和羅君章所謂其聲綿邈者也水南十里有井數百口淺者四五尺或三五丈深者亦不測其深古老相傳昔人以杖撞地輒便成井或云古人采金沙處莫詳其實也

又東與沅水合于湖中東北入于江也

湖卽洞庭湖也所入之處謂之益陽江口

漣水出漣道縣西資水之別

水出邵陵縣界南逕漣道縣縣故城在湘鄉縣西百

六十里控引衆流合成一谿東入衡陽湘鄉縣歷石
魚山下多立石山高八十餘丈廣十里石色黑而理
若雲母開發一重輒有魚形鱗鳍首尾案鳍近刻作鳍宛若
刻畫長數寸魚形備足燒之作魚膏腥因以名之漣
水又逕湘鄉縣南臨漣水本屬零陵長沙定王子昌
邑案昌受封于建平四年去定王已遠漢書但云長沙王子此定字或後人誤加漣水又屈
逕其縣東而入湘南縣也

東北過湘南縣南又東北至臨湘縣西南東入于湘
漣水自湘南縣東流至衡陽湘西縣界入于湘水也

于臨湘縣爲西南者矣

湘水出零陵始安縣陽海山

卽陽朔山也應劭曰湘出零山

案零下近刻衍陵字蓋山之殊

名也山在始安縣北縣故零陵之南部也魏咸熙二年孫皓之甘露元年立始安郡湘灘同源分爲二水南爲灘水北則湘川東北流羅君章湘中記曰湘水之出于陽朔則觴爲之舟至洞庭日月若出入于其中也

東北過零陵縣東

越城嶠水南出越城之嶠嶠卽五嶺之西嶺也秦置
五嶺之戍是其一焉北至零陵縣下注湘水湘水又
逕零陵縣南又東北逕觀陽縣案近刻脫縣字與觀水合水
出臨賀郡之謝沐縣界西北逕觀陽縣西縣蓋卽水
爲名也又西北流注于湘川謂之觀口也

又東北過洮陽縣東

洮水出縣西南大山東北逕其縣南卽洮水以立稱
矣漢武帝元朔五年封長沙定王子節侯拘爲侯國

案節侯拘有脫誤史記作靖侯狗彘漢書作靖侯狩燕

王莽更名之曰洮治也

其水東流注于湘水

又東北過泉陵縣西

營水出營陽冷道縣南山

案南下近刻衍流字

西流逕九疑山

下蟠基蒼梧之野峯秀數郡之間羅巖九舉各導一

谿岫壑負阻異嶺同勢遊者疑焉故曰九疑山大舜

寔其陽商均葬其陰山南有舜廟前有石碑文字缺

落不可復識自廟仰山極高直上可百餘里古老相

傳言未有登其峯者山之東北冷道縣界又有舜廟

縣南有舜碑碑是零陵太守徐儉立營水又西逕營

道縣馮水注之水出臨賀郡馮乘縣東北馮岡其水

導源馮谿西北流

案馮谿二字近刻訛在下句縣字下

縣以託名焉馮

水帶約衆流渾成一川謂之北渚歷縣北西至關下

關下地名也是商舟改裝之始馮水又左合萌渚之

水水南出于萌渚之嶠五嶺之第四嶺也其山多錫

亦謂之錫方矣渚水北逕馮乘縣西而北注馮水馮

水又逕營道縣而右會營水營水又西北屈而逕營

道縣西王莽之九疑亭也營水又東北逕營浦縣南

營陽郡治也魏咸熙二年吳孫皓分零陵置在營水

之陽故以名郡矣營水又北都谿水注之水出春陵

縣北二十里仰山南逕其縣西縣本冷道縣之春陵

鄉蓋因春谿爲名矣漢長沙定王分以爲縣武帝元

朔五年封王中子買爲春陵侯

案近刻侯上衍節字

縣故城東

又有一城東西相對各方百步古老相傳言漢家舊

城漢稱猶存知是節侯故邑也城東角有一碑文字

缺落不可復識東南三十里尚有節侯廟都谿水又

南逕新寧縣東

案近刻脫寧字

縣東傍都谿谿水又西逕縣

南左與五谿俱會縣有五山山有一谿五水會于縣

門案縣近刻訛作谿故曰都谿也都谿水自縣又西北流逕

冷道縣北與冷水合水南出九疑山北流逕其縣西

南縣指冷谿以即名王莽之冷陵縣也冷水又北流

注于都谿水又西北入于營水營水又北流案營近刻訛作

谿入營陽峽案入字近刻作注于二字又北至觀陽縣而出于峽

大小二峽之間為沿滂之極艱矣營水又西北逕泉

陵縣西漢武帝元朔五年案近刻脫帝字以封長沙定王子

節侯賢之邑也王莽名之曰溥潤零陵郡治故楚矣

漢武帝元鼎六年分桂陽置太史公曰舜葬九疑是

惟零陵

案此下近刻有或作零郡四字係衍文

郡取名焉王莽之九疑

郡也下邳陳球爲零陵太守桂陽賊胡蘭攻零陵激
流灌城球輒于內因地勢反決水淹賊相拒不能下
縣有白土鄉零陵先賢傳曰鄭產字景載泉陵人也
爲白土嗇夫漢末多事國用不足產子一歲輒出口
錢民多不舉子產乃勅民勿得殺子口錢當自代出
產言其郡縣爲表上言錢得除更名白土爲更生鄉
也晉書地道記曰

案記近刻訛作志

縣有香茅氣甚芬香言

貢之以縮酒也營水又北流注于湘水湘水又東北

與應水合水出邵陵縣歷山嵯陞險阻峻嶒萬尋澄
源湛于下應水湧于上東南流逕應陽縣南晉分觀
陽縣立蓋卽應水爲名也應水又東南流逕有鼻墟
南王隱曰應陽縣本泉陵之北部

案陵近刻訛作陽

東五里

有鼻墟言象所封也山下有象廟言甚有靈能興雲
雨余所聞也聖人之神曰靈賢人之精氣爲鬼象生
不慧死靈何寄乎應水又東南流而注于湘水湘水
又東北得沱口水出永昌縣北羅山東南流逕石燕
山東其山有石紺而狀燕因以名山其石或大或小

若母子焉及其雷風相薄則石燕羣飛頡頏如眞燕

矣羅君章云今燕不必復飛也其水又東南逕永昌

縣南又東流注于湘水又東北逕祁陽縣南又有餘

谿水注之水出西北邵陵郡邵陵縣東南流注于湘

其水案此下近刻衍濁字揚清汎濁水色兩分湘水又北與宜

谿水合水出湘東郡之新寧縣西南新平故縣東新

寧故新平也衆川瀉浪其成一津西北流東岸山下

有龍穴宜水逕其下天旱則擁水注之便有雨降宜

水又西北注于湘湘水又西北得舂水口水上承營